

金石萃編補略

自金石之學興舉凡簪黻以至韋布殫心篤嗜恣意網羅往往侈唐宋之摹搨別整翦之異同一字存亡千辭辯駁孤本獨抱廣座矜奇求其按代編排依文著錄津逮來學流傳前哲蓋亦尠矣 蘭谷學博行爲世式神與古會扇兩湖名勝之清芬拾三泖漁莊之賸馥積四十通綜二萬言秘寶不私識鑒彌遠肇自兩漢訖止三唐實事求是泛博非矜以此例彼品藻自異詰嗣同伯比部余典試浙江所得士也勵行脩名能世其學葆守遺書將付剞劂乞序於余因誌卷端司寇有知必爲愉快光緒壬午仲秋浙江督學使者太和張澐卿序

金石萃編補畧自序

王蘭泉先生序金石萃編之言曰天下之寶日出不窮其藏於嗜古博物之家及叢祠破冢爲田父野老所獲者何限是在同志之士爲我續之旨哉斯言誠貴有以續之也夫以蘭泉先生厯仕滇秦西蜀往來青徐兗豫燕趙垂五十餘年僅積千五百餘通余自顧何人少年足不出戶得鄉薦後始往來京師二十餘年稍收輯碑版文字嗣乃司訓壽陽仍然足不出戶遊厯旣少聞見益孤第抱殘守缺而已續云乎哉然以幼時篤好金石凡鼎彝鐘罍所有榻本俱以裝制成帙碑版雖少檢之

亦不下八九百通其中有歷久摺痕自裂者有燥濕不時腐敗者有挪移居趾遺棄者有友人假借乞去者如不早爲編錄星散雲飛莫可究詰其負疚古人爲何如矣齋居無事因檢萃編所未采者自漢至唐凡四十餘種倣蘭泉先生之例錄其全文末加案語時越四句書成二卷亦曰補畧云爾續云乎哉所采止於唐不及宋遼金者非敢外萃編之例而有所不屑也蓋唐以後碑版雜以字帖取舍難分種類又夥補不勝補是將有望於後之續萃編者補畧云乎哉

道光三十年歲在庚戌仲秋之吉仁和王言述

金石萃編補畧卷一目錄

蒼公墓記

漢永壽二年

爨龍顏碑

劉宋大明二年

凝禪寺浮圖頌

東魏元象二年

周驃騎將軍韋客卿墓誌

隋開皇十五年

中郎將石府君墓誌

仁壽四年

元公墓誌銘

大業十一年

元公夫人姬氏之誌

大業十一年

濮陽令于犀角碑

唐貞觀十四年

左監門大將軍樊君碑

永徽元年

化度寺海禪師墓碑

顯慶三年

駙馬都尉盧遜墓誌銘

顯慶四年

處士張君墓誌銘

龍朔元年

雷大岑造像碑

龍朔元年

張君懷玉銘

乾封三年

韓君墓碑

咸亨四年

阿彌陀像文

上元二年

亡宮六品墓誌

儀鳳四年

朝請大夫陳府君墓銘

垂拱四年

卷二目錄

華陰郡君楊氏墓碑

景龍三年

毗伽公主墓誌

開元十一年

曹氏墓誌

開元十一年

秦望山法華寺碑

開元十三年

膚施縣令上柱國于公墓誌

本願寺銅鐘銘

開元十八年

本願寺銅鐘碑陰

佛頂尊勝陀羅尼呪

天寶三載

段常省塔銘

天寶十二載

文安郡王張公神道碑

貞元八年

徐偃遺廟碑記

元和九年

龍化寺韋和尚墓銘

元和十三年

韋公元堂誌

元和十四年

司馬君夫人新安孫氏墓銘

元和十五年

兵曹鄭君墓誌銘

大和四年

高平郡開國公故夫人楊氏墓碑

大和四年

警空和上碑

大和七年

鉅鹿魏君夫人墓銘

會昌五年

太原縣開國男王公墓誌銘

大中四年

榮王府長史程公墓誌

咸通四年

太原王公夫人清河張氏墓誌

咸通四年

佛頂尊勝陀羅尼經

乾符三年

終南山老子道德經

金石萃編補畧卷之一

勅授文林郎嚴州府壽昌縣學訓導王言撰

蒼公墓記

石長四尺三寸濶一尺二寸額有蒼公碑三字行書

○公者黃帝時○侯也姓蒼名頡觀鳥跡以○始制文字鬼遂夜哭黃帝時白日龍見帝亦乘龍遊行及蒼頡造書龍○潛藏白日上天而去○有文字恐人書○之而鬼哭龍藏也蒼公者黃帝時史官也蒼公卽古文篆書是蒼○傳云兗州西南八十里有蒼公○學之臺○古今存焉蒼公墓者葬○雍州東北之同州界白水縣

東北彭衙城是也黃帝墓者坊州尙□古今喬凌是也

蒼公墓志譯古今文

黃絹幼婦外孫壺血

詩曰

鳳凰□勢蔭□□

軒□□□□□□□

事□□□□□□□

□□□□□□□文宣

巫山□□□南邊□

□□□□□□□水連

每到李□□明節

後□儒宗洛□先

碑側第一紙第一層

衙令朔方臨戎孫羨□□□□從事永壽二年朔
方太守上郡仇君察孝除郎中大原陽曲長 延熹四
年

○九月乙酉詔書遷衙令五年五月到官奉見

劉明府立祠刻石表章大聖之遺靈以示來世之末□
謹出錢千百□者下行自紀姓名

衙守丞臨晉張疇字元德五百守左尉萬年長沙瑗字

字君平五百

第一紙第二層

衙縣三老上官鳳季方三百

衙鄉三老時勤伯秋三百

衙主記椽楊綬子長三百

衙門下功曹裴篤伯安三百

衙門下游徼許愔功上三百

衙門下功曹徐□□□

第一紙第三層

功曹史上官□□□□

錄事史楊禽孟布三百
集曹掾馬津子孝三百
倉曹掾任就子□□百
故功曹郭□□□百

第一紙第四層

軍假司馬衙

從掾位郡□

從掾□衙□

故文學掾衙□

故文學掾□

碑側第二紙第一層

議曹史蓮勺楊□三千

功曹書佐頻陽成□千

□吏蓮勺任叅六百

□吏高陵□肆六百

□吏臨晉□珠六百

□吏高陵張順六百

第二紙第二層

萬□左鄉有□□□□□□

萬年左鄉有秩游智□□□□

萬年北鄉有秩□□千五百
蓮勺左鄉有秩杜衡千五百
池陽左鄉有秩何博千五百

第二紙第三層

□□□□□□□□

夏陽侯長馬琪□

栗邑侯長何憚□

□□侯□□□□

碑無建立年號惟碑陰有永壽延熹字知此爲漢
石無疑字畫方整古勁尤非唐隸所能彷彿文雖

剝落可辨者尙有十分之七八惟碑下詩語已泐
十之七八讀不成句碑正面上截載文約十之六
下截載詩約十之四碑側二紙第一紙第一層首
載朔方臨戎云云似書年月末行卽書君平五百
并連書出錢人名姓凡四層第二層書衙縣三老
上官等第三層書功曹史錄事史楊禽等第四層
書軍假司馬等其第二紙分三層第一層書蓮勺
等第二層書萬年左鄉等第三層書夏陽侯長馬
琪等夫永壽延熹皆漢桓帝年號也延熹五年有
蒼頡廟碑有碑陰有兩側采入萃編卷十墓碑則

未之見也此碑書延熹四年在立廟碑之前一年
何王氏見彼不見此也同此一石也同此一時也
同在一鄉也一顯一晦不同若是余因亟錄之以
補王氏之畧惟此碑側出錢人姓名爵里與廟碑
無異并前後次序亦同殊不可解或者以廟碑兩
側之文誤附此碑後耶抑不知墓碑之側猶有舊
搨人誤附於廟碑後耶否則必無前後合轍如此
之異墓在今西安白水縣漢左馮翊衙縣而碑側
衙字則又作御皇覽云蒼頡墓在利陽亭南墳高
六丈卽春秋秦晉戰於彭衙之地故漢有衙縣之

稱碑文所云東北彭衙城是也據萃編云廟碑已
損臥土中囑縣令移至學宮不可得則此墓碑之
失更久矣余何幸得此漢拓與西岳華山半碑同
一可寶耶

余前在京師得
華山碑半冊

樊龍顏碑

石長九尺闊五尺二十四行行四十五字正書額有宋故龍驤將軍護鎮蠻校尉宜州刺史邛都縣侯樊使君之碑

正書二十四字

君諱龍顏字仕德建寧同樂□□□□□□□□
之玄胄才□祝融之眇胤也清源流而不滯深根固而不傾夏后之盛敷陳五教勲隆九土糾□□□□古仁功播於萬祀故乃燿輝西岳霸□郢楚子文銘德於春秋□朗紹縱於季葉陽九運否蟬蛻河東逍遙中原班肅剛定漢紀班固述脩道訓爰暨漢末菜邑於樊□氏投焉姻婭媾於公族振纓蕃乎王室乃祖肅魏尚書僕

射河南尹位均九例○革○朝遷運庸蜀流薄南入樹
安九世千柯繁茂百葉雲興鄉望標於四姓逸冠顯於
上京瑛豪繼體於茲而美祖晉宣建宣二郡太守龍驤
將軍宣州刺史考龍驤輔國將軍八郡監軍晉宣建宣
二郡太守追謚宣州刺史邛都縣侯金紫累跡朱轂充
庭君承尙書之立孫監軍之令子也容猗瑋於時倫貞
操超於門友溫良冲挹在家以聞本州禮命主簿不就
三辟別駕從事吏正式當朝靖拱端右仁篤顯於朝野
清名扇於遐邇舉義熙十年秀才除郎中相○西鎮遷
南蠻府行參軍除議守邊宣太守割符本○衣錦晝遊

民歌其德士詠其風于是貫伍廊朝本州司馬長史而
君口振慷慨志存遠御萬口將闕除散騎侍郎進無休
容退無慍色忠誠簡于帝心芳風宣于天邑除龍驤將
軍試守晉寧太守輅車遊口金章紫綬棨戟憧憧襲封
邛都縣侯歲在壬申百口遊聲州土撥亂東西二境凶
豎狼暴口戍寇場君收合精銳五千之眾身伉矢石搢
碎千計肅清邊隅君南中磐石人情歸望遷本口龍驤
將軍護鎮蠻校尉宜州刺史邛都縣侯君姿瑛雄口高
畧敦純懿之宏度獨步南境卓爾不羣雖子產之在鄭
蔑以加焉是以蘭聲旣暢福隆後嗣者矣口非愷悌君

子孰能若斯也哉旻天不吊寢疾彌篤享年六十一歲
在丙戌十二月上旬薨黎庶痛悼□幾傷懷□□朝遠
感追□中牢之饋也故吏建寧趙□之巴郡杜長子等
仰竇□德永慕玄澤刊石樹碑褒尚休烈其頌

巍巍靈山峻高迢遰或躍在掬龍飛紫閣邈邈君□天
姿瑛哲縉紳□門揚名四外束帛箋箋禮躬交會優游
南境恩出稟□撫伺方岳勝殘去煞悠哉明后德重道
融綢繆七經騫騫逸躬鳳翔京邑曾□比蹤如何不吊
遇此繁霜良木摧枯光輝潛藏在三感慕孝友哀傷銘
邇玄石千載垂功

祖已薨背考志存銘記良願不遂奄然身終嗣孫碩子
等友乎哀感抒尋□訓永慕高蹤控勒在□仲秋七月
登山采石樹立立碑表殊勲于當世流芳風于千代故
記之

宜州長子驍宏早終次弟驍紹次弟驍暄次弟驍崇等
建樹此碑

大明二年歲在戊戌九月上旬壬子蒲嗣孫□□□□
碩□碩萬碩思碩□碩羅碩□碩俗等立

匠碑府主薄益州杜長子

文建宜爨道慶作

碑尾阮跋

此碑文體書法皆漢晉正傳求之北地亦不可多得乃雲南第一古石其永寶護之總督阮元

碑尾邱跋

右爨使君碑在陸涼東南二十里貞元堡碑立于劉宋文帝大明二年九月距今已千三百餘年矣通篇僅十數字漫漶餘皆神采煥發較之南詔碑獨爲完善設移入中土早經摹榻流傳顧以遠在邊陲不獨趙宋以來錄碑諸家所未見卽王蘭泉司寇在填收採金石亦未之及至阮芸臺節相開

府填黔始訪而得之稱爲雲南第一古石厯任湮
蕪出之于礪綸鍛波筵可不謂厚幸與余承乏州
牧拓得數木裝潢成帙旦晚復有粵西之行遂携
寘囊笥中倘亦陸續鬱林之遺意乎時道光十二
年歲次壬辰月建壬子癸酉判知州事閩黔邱均
恩跋因以題名

道光七年知州□□建亭

碑陰題名作三層書

第一層

府長史建寧爨道文

司馬建宣龔德文

錄事叅軍武昌尉劉觀

功曹叅軍建宣孟德倫

倉曹叅軍建宣龔□宣

戶曹叅軍建宣周賢□

中兵叅軍鴈門郡王□

府功曹建宣□□□

主簿建宣趙道主

別駕建宣龔敬祖

治中晉宣趙世伐

主簿建宣龔德助

主簿建宣孟升明

西曹蓋宣楊琮子

西□晉宣駱雄

第二層

鎮□長史建宣龔世明

司馬建宣□順□

錄事叅軍建宣毛瑋□

功曹叅軍□□李融之

倉曹叅軍牂柯謝國□

○曹參軍○廣楊道育

中兵參軍建宣龔孫記

○前功曹建宣○正祖

主簿建宣孟令○

主簿建宣孟順德

門下建宣龔連○

錄事○陽○舒仁

西曹建宣周令括

戶曹建宣陳世○

○事安○○稚士

書佐建寧孟羅

□張孫明

第三層

錄事孟林宗

西曹劉道喜

戶曹伊仲華

記室張升□

朝直張世保

□下都督王道盈

□□□□頭

□□□□文

□□□康

門下張□

錄事夔敬

西曹伊開

戶曹□叔子

□書李道學

書佐單仲□

□盛慶子

夔龍顏宋書無傳乃祖肅仕魏任尚書僕射三國

志魏書亦無傳下又叙祖晉宣建寧二郡太守父
入郡監軍而皆不書名祖之名肅者乃其始祖非
曾祖也故下云尙書之元孫監軍之令子劉宋篡
晉以來至大明二年已三十八載矣中年多故宣
州僻阻遠方故祖爲晉宣建寧二郡太守宣州刺
史父亦爲晉宣建寧二郡太守宣州刺史及身仍
爲宣州刺史想爾時祖孫自行襲爵鎮據一方未
必書承朝命也逮其後自王蠻中唐書直以兩獍
蠻目之蠻芋蠻矣聲教不通習俗亦異文章書法
欲求如劉宋時之制作諒不可得幸有此碑光於

一千三百餘年之後乃知夔氏之所由來本非蠻人此金石文字之所以可寶也兩夔有白蠻烏蠻之分自曲州靖州至安寧距龍和城通謂之西蠻白蠻自彌鹿升麻南至步頭謂之東蠻烏蠻西蠻自云本安邑人七世祖晉南寧太守中國亂遂王蠻中有地二千餘里至隋開皇時夔瓚之子名震翫者襲位入朝隋文帝誅之諸子沒爲奴至唐高祖始以其子宏達爲刺史奉父喪歸而夔氏乃微矣說見唐書南蠻列傳唐書曰自云安邑人且僅溯其七世祖而不知其源流得此可以爲唐書之

確証并能遠述仕魏之祖唐書所謂七世祖晉者
當是龍顏之子孫也顏死於劉宋文帝元嘉二十
三年丙戌以年六十一歲推之當生於晉孝武太
元十一年丙戌舉義熙十年秀才時年二十九由
是除郎中遷叅軍遂爲邛都縣侯不知何爲司馬
氏所授何爲劉宋所授碑俱不載且晉宋興滅之
事概寘不錄故余以爲僻阻遠方官或自襲均不
可知此碑於壬辰癸巳間寓都中儀徵阮相國第
公子錫卿由滇南至京以此見貽并賸以新莽金
錯刀一柄藏之行篋幾二十年今因補萃編之缺

亟錄之以示將來

凝禪寺浮圖頌

石高六尺闊三尺六寸正書碑額繆篆書
凝禪寺三級浮圖之碑頌十字奇古雄健

纖景凝麗斯海鏡圖明皇秀潛映則□□□□□□
聖□□□□□□縱現元吉而輝□□□高蹈七步躍
天人之儀駕遊四門悲生老爲□啟□光□於長夜流
駒彩翼於重昏元鑒動於真機靈照渙於寂像無言之
論拂石記年沙童之說彈指爲證權影哀於羣宗應響
□于類族靡身不卽卽也□流仁無音不曉曉也而知
覺斯實不思議之至妙也然化厯世二境□盡四域之
鄉靈軒迢輒遷隱雙樹金顏雖遙經圖流範是用育王

之塔東生隆基優□之像西域彌禮法輪滿世妙露斯
光但羣品異途行乖殊致念迷井之獮自亡于木繡百
首之鱗懸鰓于鈎庸貪愛溺于死河春蠶圓絲入繡自
□抽類神峯超然孤秀者焉能于滄漚之津而拯彼圻
哉□止信佛弟子趙居士名融字祖和元氏人也其先
與秦同姓至周穆王造父有駮□之勲賜姓趙氏爰匡
彌晉□暨于武靈王布錦千城散綺萬國郁郁顯于篆
冊穆穆聰至於斯矣遠祖□漢司徒公征□將軍都督
內外諸軍事冀州刺史趙郡公纂□芳于遐葉遂因封
此焉居士融蘊冲淡之妙性如荔□之瑤馨懷珠照□

若霄漢之朗月雅志貞素行潔儒流清風峻遠栖心
史恆以世禪育命食□養年化無微迹人不□言霜齡
長碧雪月□清不闕玉帛之門不踐縉紳之□靖夜閑
吟任運衰榮卓絕□倫可謂冲操自然矣居士融每嘗
嘆曰蜚螻無夕命椿柯亦雕零神飄生滅境如雀飛空
□鄉□覆詠斯文則淚沾變石居士融正以妙味自怡
何暇珠纓之禁□□□尙其仁素伴貴其清方鼂欽木
蘭之泆露兮夕飡秋菊之渃英携筇挂以紉蕙兮索胡
繩之□纚安貧樂道井丹之流兮忠清淳信子良之徒
兮輕金樹福□達之倫兮惓然孤舉之翰逍遙出塵之

志是故鄉老呼之曰居士融乃怵然而嘆曰觀世之□
死也何異飛蛾之夕火焉慘鳥羽之度牖悼蝴蝶之變
靈怨蟬啼之漏促悲霜華而淚盈卽共長兄浮陽太守
文□元氏公文□邯鄲令□奴元氏令靈和昉子令靈
宣長兼叅軍□□兄弟等孝友恭良頤居茂于紫荆皆
□叙衣冠□錦百里率鄉賢道俗二千餘人等並信敬
玄深體空虛寂詳造三級浮圖凝禪寺□構蕭廓寶堂
密靖層甍耀于霞漢玉續璣于瓊珉飭以丹碧黥以仙
形松柳翠鬱井級淒涼鴻飛則雲波風嘯百籟吟居士
融復衢設義滄珍饈□□□迎愧送□於文□至其處

○瞻峻埤霰○之所聚蒼北城峻峙白王之固綿基東
有村○蓊蔚連烟西嶺○岌○光翳而迴薄其寺妙像
精異遊○忘歸所造之福仰資皇○
公百司師僧父○識性之類梵水洗心常生淨樂居士
融之善上昇人天下○鬼壤鄉義僉言○葺織容之功
尙詠于金篇片瓦之施猶頌于遺陵況居士融建斯景
福豈得篋聞哉恐靈迹勝因空傳無記故鄉人中兵叅
軍鄭鑒邑義二千等慕海春之餘韻美○
相與託鍾山以旌妙軌刊立石以颺鴻芳當使淥竹之
彩常搖於紫風青松之碧永輝于素月其詞曰

金衣去後
森森冲覺寂寂虛清塵中獨鏡霧里孤明龍□□跡素
木歸靈□夢垂影雪山流□□□同習分言其聲明珠
泣醉羊鹿悲嬰林□水淥虬翔雲枝嶠驚風遠給孤化
移金粟爰集文殊來儀鈇拂重秀枯蓮更猗遺芳之軌
妙猷仍玄濁浪澄曦晌曙凝淵□士□和兄弟眞賢體
茲四空五有非玆□率鄉儒營斯福田津流遐□果鍾
人天祗□還日提河再年惠風燭拂昏境除烟

大魏元象二年歲在申二月乙未朔十□五日巳酉
造刊□訖□

第一層

□□將軍段州長史河東薛安民

趙郡太守趙伯材

博陵太守趙□堂

安東將軍銀青光祿大夫秦州別駕□城太守趙元□

高柳太守趙武□

鉅鹿太守趙問石

廣平太守趙稚

渤海太守趙玉

華陽太守趙太周

趙郡太守趙元顯

廣陽太守趙曇度

樂安太守趙世顯

常山太守趙彤□

平原太守趙神□

齊郡太守趙神□

蘭陵太守趙珠

常山太守趙領標

襄城太守賈蘭根

代郡太守賈祐齊

鄉郡太守賈高

廣川太守賈王

樂陵太守賈道貴

成陽太守程文生

伏波將軍大行臺下帳內別將程顯邕

伏波將軍程鸞烏

鎮遠將軍程景導

靖境別將程雲遵

定陽太守劉班口

下邳太守侯晉安

定陽太守侯富爾

□屯太守□金柱

趙郡太守□□桀

沛郡太守□超世

廣平太守□甫

征虜府長史馬市買

北平太守□僧懷

元氏令趙芳林

第二層

□趙太守趙江貴

鉅鹿太守呂市保

伏波將軍路縣令趙□花

安戲令趙道安

九門令賈曇受

元氏令張奴

高邑令張論

元氏令趙□□

趙郡曹郝市邕

高邑令劉次保

平鄉令賈□

德州西曹賈仲業

南□令鄭詳

深翟令程沙迷

南宮令程武安

□子令程□□

平鄉令程麴

毋極令程萬興

元氏令程曇金

毋極令范聽

伏波將軍程顯和

樂城令杜思和

中水令趙景林

元氏督護褚景馥

殿中將軍吳慶和

□都令侯拒

趙郡上官楮悅

趙郡主簿褚豐禮

趙郡上官楮文□

易陽令□倉

羸州□守董景□

鎮城長史侯早

曲陽令江□

九門令王□

此碑上半截書頌文下半截書人名書名又分十三層其第一第二兩層則書官書名俱備錄于右其下十一層但書名而無官皆鄉里中人也每層約三十九人十一層共有四百十餘人字繁不錄元象者東魏孝靜帝年號而元象只有元年其二年改元興和歲在己未末行書元象二年歲在申殊不可解碑有但書年之天干者今乃單書地支想是興和二年庚申也地僻在遠不知改元因以

興和二年爲元象二年耳創建者爲居士趙融而書名中之趙姓有官爵者二十人何趙氏之盛也興和二年爲梁武帝大同六年是時南北皆崇釋教浮圖之建俗尙如斯其字則楷書而仍兼隸法方整嚴密實出唐碑之上當是兵叅軍鄭鑒所書也迻卽移字楚詞屢懲艾而不迻是也或又作拖作敏擒音禽驚獸也繡同纏音施絲有粗細經緯不同也說文云粗緒也瀉同瀉瀑水沸湧貌洑音亦與溢同水放洑也洑同餐諾俗落字不見字書箇卽箇字同茵飭同飾嶠音倉山勢嶠巨支切音

金不古 續補卷一 三
者本釋典字嶠鷺二字頗新其餘多怪則不見字
書

周驃騎將軍韋客卿墓誌

石長方一尺有一寸
楷書後有吳光榮跋

周驃騎將軍右光祿大夫雲陽縣開國男韋君墓誌銘
公諱賓字客卿張掖永平人也自壽邛之山卿雲照三
星之色襄城之野童子爲七聖之師繼喆傳賢肇終古
而長懋垂陰擢本厯寒暑而流芳曾祖澄西河鼎望行
滿鄉閭後梁召拜中書侍郎建威將軍玉門太守屬涼
王無諱擁戶北遷士女波流生民塗炭乃與燉煌公李
保立義歸誠魏太武皇帝深加禮辟授使持節大鴻臚
散騎常侍高昌張掖二郡太守封永平侯贈涼州刺史

祖右文西平鎮將考天慶汝南太守政脩奇績世襲茅
土州閭畏憚豪右敬推家享孝子之名朝捐良臣之譽
門稱通德里號歸仁公惟岳惟神克岐克嶷幼而卓爾
爽慧生知長則風雲英聲自遠永安二年從隴西王爾
朱天光入關任中兵叅軍內決機籌外摠軍要除平東
將軍大中大夫周太祖龔定關河公則功叅草創沙苑
苦戰勲冠三軍封雲陽縣男邑五百戶大統十七年除
岐州陳倉令周二年除敷州中部郡守厯居宰莅民慶
來蘇野有三異之祥朝承九里之潤保定二年授司土
上士四年遷下大夫濟濟鏘鏘允具瞻之望兢兢審審

見匪躬之節天和二年授驃騎將軍右光祿大夫四年
任豫州長史別駕駿驥足起千里之清塵鬱鬱鳳林
灑三春之德澤君子仰其風猷小人懲其威化諒人物
之指南實明君之魚水俄以其年十二月遘疾薨于京
第春秋五十有五夫人許昌陳氏開府儀同金紫光祿
大夫岐州使君西都公豐德之長女也繇翔飛鳳則四
世其昌天聚德星則三君顯號清音麗響與金石而鎗
鏘秀嶺竒峯隨風雲而縈鬱夫人資光婺彩稟教嚴閨
淑順內和容言外皎高門儷德君子好逑保定元年先
從朝露春秋冊十五爲仁難恃天無獨善之徵樹德遂

孤神闕聰明之鑒唱隨俄頃相繼云亡逝者如斯嗚呼
何已公夫人之卽世也時鍾金革齊秦交爭車軌未并
主祭幼冲且隨權瘞今世子營州總管司馬武陽男志
次子右勲衛大都督上洪男寧運屬昌朝宦成名立思
起蓼莪心纏霜露攢風枝而永慟哀二親之不待陟岵
岵而長號痛百身之罔贖乃以今開皇十五年歲次乙
卯十月丙戌朔廿四日巳酉奉厝于雍州始平縣孝義
鄉永豐里高岸爲谷愚公啟王屋之山深谷爲陵三州
塞長河之水懼此賁遷故以陳諸石鏡銘曰

白帝朱宣實粵金天西河良將張掖開邊承暉接響世

拔英賢賢哉上喆時之人傑夏雨春風松心竹節肅等
霜嚴清同冰潔司戎幕府作守敷陽蝗歸河朔瑤見陳
倉大夫濟濟士實鏘鏘文龜玉印紫綬金章首僚驥足
耀此龍光必齊之姜必宋之子儷德高門家榮桃李行
滿婦箴聲揚女史春秋代序春非昔春閱人成世世不
常人精華已矣空想芳塵口日怛逝時屬屯窮蒿里尙
隔黃泉未通孝子惟孝追遠追終永茲玄宅穴此幽宮
山浮苦霧樹動悲風流冰噎水上月凝空悠悠自古寔
寔皆塵

附吳拔

嘉慶己卯年四月偃師段嘉謨訪出此石于武功縣之南鄉移置縣之大堂南海吳榮光觀並記

曾祖仕梁又仕魏祖父均仕魏客卿以魏孝莊帝永安二年從爾朱氏入關至大統十七年卿猶仕西魏未仕周也故用西魏大統年號至宇文氏起卿乃除數州中部郡守周武帝保定二年授司土上士周天和二年授驃騎將軍至四年乃卒越二十一年而天下統於隋又越六年爲隋開皇十五年乙卯始卜葬于雍州卽其所厯由魏至西魏暨周凡三見滄桑而不獲一日見唐統一之盛生長

亂離承平乃葬其所遇亦可哀矣字是北派頗有
隸意以出土較遲筆畫未損今置之武功縣署恐
椎搗日多未能歷久也

中郎將石府君墓誌

石長方
尺二寸

故左武衛中郎將石府君墓誌銘

并序

前太子通事舍人朱仲武撰并書

公諱暎字先進其先樂安人後世家於京兆今則京兆人也晉將軍苞之慶胄衛純臣礪之靈苗祖考守珎皆公侯繼業鍾鼎傳門載籍昭彰其來自遠公策名委質夙著令聞孝以承家忠以奉國故得鄉黨稱悌焉朋友稱義焉可謂不忝不怍有典有則者也頃以方事之暇燿火不息而能率先義勇克集茂勲累遷至左武衛中

郎將前朝賞有功也公志懷敦素性守謙冲不以榮顯
介情但以優遊晦迹而已所冀神降其福天與之齡何
圖兆夢泣瓊藏舟弃壑哀哉以歲次□□十一月十四
日遘疾終于私第春秋六十有八夫人孫呂夙稟坤儀
素傳內則鼓琴瑟而有節主蘋藻而知禮嗚呼薜花早
凋瓊枝遽折天不慙遺先公數稔而亡今以歲次甲子
四月庚午葬公於長安龍首原夫人祔焉禮也嗣子清
士冕岳岳湊岫秀等蓼莪在疚欒棘其形泣血於苴麻
竭力於窀穸恐時遷陵谷事或幽封爰命揮毫敬刊貞
石詞曰

性質溫溫神儀泚泚職忝禁衛位列中郎流芳後代秉
義前王冀保永終曷其云亡卜兆吉辰素車薄葬爰遷
嘉偶及此同壙魄散泉扃神遊總帳後背重崗前臨疊
嶂聊紀卅載式昭門望

碑稱前朝又云前太子通事石君蓋南北朝陳人
或爲周人均未可知復以左衛中郎將官名按之
此官漢因秦制晉武帝始省去至南北朝宋孝武
皇帝大明中復置齊亦因之則以石公爲宋齊間
人亦無不可總之南北亂離區宇莫主書曰前朝
爲隋之已統一北南而諱也不書隋號不忍忘其

舊也其葬于甲子蓋卽隋開皇改元仁壽之四年也

元公墓誌銘

石長一尺五寸闊尺九寸三
十七行行三十七字正書

大隋故朝請大夫夷陵郡太守大僕卿元公之墓誌銘
君諱□字□智河南洛陽人魏昭成皇帝之後也軒
肇其得姓卜洛啟其興王道盛中原業光四表其後國
華民譽瓊萼琤枝源派流分奮乎百世具諸史冊可畧
言焉六世祖遵假節侍中撫軍大將軍尚書左僕射冀
青兗豫徐州諸軍事冀州牧常山王高祖素假節征西
大將軍內都大官常山康王曾祖忠使持節骠騎常侍
鎮西大將軍相太二州刺史侍中尚書左僕射城陽宣

王祖暉使持節散騎常侍都督徐州諸軍事平東將軍
徐州刺史宗正卿父最使持節侍中驃騎大將軍開府
儀同三司尚書左僕射華敷南秦并幽晉六州諸軍事
六州刺史司徒公樂平愼王維君幼挺奇資早飛令譽
識鎮表於觀虎風流見於乘羊落落高標排青松而獨
聳亭亭峻節映綠竹而俱貞吐納美風規雍容善辭令
通人仰其好仁僚友稱其孝友於是聲譽流洽孟晉追
羣周保定四季詔擢爲左給事中士禁內清切王事便
繁許史之親乃膺斯授金張之寵方降此榮陳力效官
獨高前代天和四季遷爲給事上士貴遊子弟實符束

哲之辭名士俊才不愆苟綽之記望袁准而高視顧蘇
林而載馳建德元季入爲主寢上士粵自居中遷于內
寢自非不言如子夏至愼若嗣宗豈能淑愼於否臧無
言於溫木三年二月轉爲掌式中士君圖清脩疾惡正
色謹言簪筆自肅於權豪霜簡不吐於強衛故已聲齊
乳虎號擬蒼鷹官得其人斯之謂矣五季四月以君姪
正幹職遷爲司御上士時三方鼎足務在并兼旣物色
賢人且資須良馬五監三令未易其人宣政元季以軍
功封豫州之建寧縣男邑二百戶其年八月又錄晉陽
之役加使持節儀同大將軍大象二年又仍舊封進爵

爲子擁茲絳節擬上將之儀苴以白茅開建國之杜尋
遷少駕部下大夫簪金日磬以謹養致肥武帝擢之中
監百里侯以時使不暴穆公授以上卿望古儔今於茲
爲美開皇元年出爲益州武康郡太守公導之以德齊
之以禮田餘滯穗路有遺金又進爵爲伯轉儀同三司
從格例也秉彼躬珪輝煥五等服茲袞冕照映三台九
年授使持節扶州諸軍事扶州刺史十六年改授渝州
諸軍事渝州刺史公頻刺二州申威千里抑強而惠鰥
寡舉善而矜不能猾吏無所竄其情奸盜不能匿其跡
聖上纂承洪緒改刺州選任能官更授夷陵太守公

肇應嘉舉彌厥清勤巴衽暗居不□官燭王閔獨坐不
發私書由是徵入爲太僕卿朝請大夫如故時達遽令
式贊弓矢摠駒駟之監長統昆□之令丞駟加駿銳於
軍容犧牲備膺於 柴望方當控茲八駿御彼六龍登
栢梁而賦詩出上林而奉轡而晦明之疾旣湊膏肓之
豎先猥大業九季扈從遼碣□月□日遘疾云亡薨于
懷遠之鎮春秋六十有四嗚呼哀哉迺以十一年太歲
乙亥八月辛酉朔廿四日□□葬于大興縣□□鄉□
□里禮也維公器局疏通神情秀上虛心以待物直已
以明義不吐不如正色正言面刻有汲黯之風□爭見

王陵之節旣而出宰牧守入作卿士奸吏惴其撻伏朝
产挹其能官重以知止知足維清維慎家餘海陵之粟
旣自足於餘梁室傳夏后之璜差無乏於玆玩至於殮
錢月給必均之於下吏祿俸歲受皆散之於親知斯乃
公孫弘之高風晏平仲之清規矣仁乎不憖嗚呼惜哉
今龜筮協從房腸行掩式鏤玄石用作銘云

巖巖其趾浩浩其源極天比峻浴日同奔鳳生鳳穴龍
陟龍門煥爛珪璧郁馥蘭蓀爰啟常山迺建王爵振振
趾定鞞鞞跼執法南宮建旗東岳袞黻委他蟬珥照
灼太僕瑤枝人之表儀六德孔備百行無虧丘陵難越

墻仞莫窺仁爲已任清畏人知執法主寢牧州典郡審
審讜言洋洋淑問虎去雉馴風和雨順政號廉平民稱
惠訓靈旗東指巡海稜威秉轡作僕方効乘機忽悲撤
瑟俄驚復綏龜謀空襲魚躍虛歸颺颺反葬眇冥陽魄
永愴焄蒿長悲宅寥蓋偃伍松鑪攢拱栢茂德洪名永
宣金石

元公西魏宗室入北周爲左給事中士故碑云魏
昭成皇帝之後又云保定四年詔擢爲左給事保
定西魏武帝年號也至天和四年遷爲給事上士
建德元年入爲主寢上士則西魏已亡而仕於北

周矣由是宣政二年封建宣男大象二年進爵爲
子不二年而北周又亡乃仕於隋之開皇元年爲
益州武康郡太守身歷三姓仕北周二十四年仕
隋二十九年至隋之大業九年乃卒於懷遠其人
遭亂而無特立之節正是五代陋習無可稱述周
隋二史俱不爲之立傳惟曾祖諱忠者見於周書
元偉傳偉亦河南洛陽人與碑云洛陽正合又云
魏昭成之後與碑又合忠爲尙書左僕射城陽王
與碑又合惟傳云城陽王而碑則云城陽宣王耳
偉傳云祖盛父順而碑則云祖昺父最想彼此但

其曾祖而自忠以下祖父則又支分派別也據偉傳按之元公當是偉同曾祖之從昆弟然元氏多達人偉傳附載有所謂元欣者有名子孝者名季海者名育者名儉者名贊者名則者名羅者名正者名顏子者名壽者名審者不下十數人而曷與最俱爲將軍並同曾祖何獨不見采入良可疑也或據碑以補史之缺畧亦無不可此碑元公名號已泐不可攷賴有曾祖忠之名與爵里可與史證又賴有此石使曷與最之名並垂不朽於千載後未始非金石文家之力也拓本藏於紹興後馬周

氏辛亥二月周啟人兄自後馬來壽邑抄本見示
用亟入於萃編補畧云

元公夫人姬氏之誌

石長一尺六寸濶二尺二
十七行行廿七字正書

大隋故太僕卿夫人姬氏之誌

夫人姓姬□□也圖開赤雀文德暢於三分瑞躍白魚
武功宣於五伐大封四十維城於是克昌長享七百本
枝以之蕃衍蟬連史策可畧而言曾祖懿魏使持節驃
騎大將軍東郡□公祖亮魏使持節大將軍開府儀同
三司燕州諸軍事燕州刺史東郡敬公父肇周使持節
侍中驃騎大將軍開府儀同三司光祿大夫東秦州諸
軍事東秦州刺史勲晉絳建四州諸軍事勲州摠管神

水郡開國公 夫人幼挺聰慧早標婉淑瑤資外照蕙
性內芳既閑習於詩書且畱連於筆研馬家高行終降
志於袁門曹氏淑姿且悅已於荀氏年十有八歸於元
氏焉太僕弱冠登朝盛播名德夫人亦虔恭內職憂在
進賢穆琴瑟之和展如賓之敬天和四年六月筭拜建
寧國夫人瑜狄委他光膺典策衡珮昭晰肅拜朝榮於
是輔佐以審官自防以典禮送迎未嘗逾闕保傅然後
下堂旣而五福先虧六氣多爽青要素序奄搖落於禮
華玉露金風竟摧殘於蘭蕙建德六年六月九日遘疾
云亡時年廿九嗚呼哀哉以今大業十一年太歲乙亥

八月辛酉朔廿四日甲申合葬於大興縣□□鄉之□
□里禮也昔三春之俱秀獨掩翠而先訣今百年而偕
謝始同歸於其穴韻金鏤而長埋掩銅窓而永閉嗚呼
痛矣乃作銘云

帝嚳肇祖君稷分枝上觀星象下相土宜業隆在鎬仁
盛遷岐三讓至德九錫光施

驃騎誠烈早飛聲問擁茲絳節大啟東郡開府堂堂忘
情憇愠神水恂恂劬勞惠訓

有淑其德言容不迴星光束楚春芳標梅六珈照日百
兩驚雷鳳飛金帳龍翔玉臺

典箴纔臨瑟琴方睦猶垂翠帳忽辭華屋輝簾畱挂巾
奮餘馥志沮旦疰神傷畫哭

昔日體齊早別春閨今茲合葬還共塵泥雙鳥翫雙兩
劍終齊千秋萬歲永誌貞妻

此碑卽元公夫人合葬之碑但叙母家三代不及
元公名并其子女亦不書恐卒時年二十餘尙未
有子女也不然何脫畧乃爾

濮陽令于犀角碑

石高四尺八寸濶二尺二寸有碑額篆書大唐故
騎都尉濮州濮陽縣令于公之碑十六字碑文正
書

大唐故騎都尉濮州濮陽縣令于公之碑

君諱孝顯字犀角河陰河南人也肇自赤雀棲戶白魚
躍舟時經百代歲逾千祀崇基綿邈與嵩鉞而齊高華
胄芬芳共蘭蓀而竝馥廷尉以陰□□□名播漢朝將
軍以陷陳揚麾聲流魏室自此琳琅接耀軒冕連陰雖
張湯之七葉珥貂郗鑒之四世台鼎方之蔑如也曾祖
提魏孝文以勅勤地居□氣接幽都陸梁狼望之前掘

強龍庭之外遂授公節鉞奉使宣威公喻以□亡示其禍福勅勤犁□樹□獻馬稱藩主上嘉使乎之功授以征北將軍隴西太守自魏厯將終周圖已兆元臣舊佐咸加爵賞蒙授使持節太傅柱國大將軍封建平郡開國公從班例也祖瑾周太師三老尙書右僕射柱國燕國公謚曰文巨川舟楫鼎鼐梅壔理陰陽寒燠無急舒之□弼□王□□令有清靜之□父檀周使持節大候正大將軍趙州刺史安平郡開國公周武帝親御六軍問罪東夏躬麾九伐爰整西師乃以公爲大使摠知兵馬節度□□居鼎□□□齊王處帝弟之親咸皆稟

其英謨諮其進止公平施十計閒出六奇或飛書下城
或舉旗陷陣□□颺之卷寒薜旭□之泮春冰曾未浹
辰僞都平蕩□武平齊之日惣集僞官謂高□躬肱曰
平郡國者由此人也昔呂子牙之佐周號鷹揚而滅紂
王士洽之翼晉歌龍讓而殒吳□代相望□無慙德君
稟川岳之靈膺星辰之氣角立傑出高齋獨翔括四行
之樞機軼九德之軌躅一室不掃陳仲舉之生平萬里
封侯班仲升之意氣發巖電於神彩韞□□于匈懷騫
騫如積風之運鵬昂昂如籥雲而□驥開皇十三年起
家任右親衛非其□也阮嗣宗之傲誕屈以步兵馬叡

子之文詞登之武騎俄而文皇晏駕煬帝嗣興剗刮舊
章革創新政瑋室瑤臺之制邁辛癸之宮車轍馬跡之
行越姬劉之幸公乃告歸託疾養素叩園不事王侯鑿
坏而已於是瀛賓斷問慶弔不通保周陂而訪三姜依
蔣徑而尋二仲甘樂山藪木石爲隣燕歌唱而白雲凝
邛琴奏而玄鶴舞讀張衡之賦且悅歸田諷宋玉之詞
寔憂失職逮隋風已替率土分崩九服移心三靈改卜
天星驟落海水□□萬姓嗷嗷瞻烏靡所太上皇龍躍
□野鳳舉秦川揮寶劍而斬素靈擁神兵而膺赤伏羣
雄畢湊眾善咸歸遂仗劍轅門投□獻款蒙補左武侯

錄事參軍於時義寧元年也皇圖淑落帝典權輿王世
充叛換洛川竇建德憑陵河朔蟻集蜂扇狼顧鷄張駟
掠我黎元違拒我聲教眷言經畧理資英傑乃授元帥
府鎧曹參軍于是破八關堡清城宮口太陽門陷陣先
登獲勲第一蒙授驍都尉武德四年授雍州錄事參軍
處神州之要居輦轂之下五方雜沓四民設阜紕撻茲
伏思若有神不待赭汗之口詎勞鈎距之詐貞觀元年
又授朝議郎行濮州濮陽縣令君下車布政除煩去瘼
而移風易俗口口三年俗富刑清纔逾朞月還牛怨米
是表於深仁馴雉移蝗爾彰於善政豈止沉不鄴縣畱

神口壇而已哉水積歸塘竟滔滔口東注日沉昧谷遂
黯黯而西徂辰巳之夢忽口膏肓之祟便口以貞觀十
年四月四日寢疾卒於濮陽官舍春秋六十四陶潛琴
酒對彭澤而誰懽言憮絃哥臨武城而莫奏嗚呼哀哉
君器宇淹凝風神秀逸口懷肅穆與寒松而並勁志氣
蕭條其秋天而兢爽履仁爲度蹈義成基不以富貴嬌
人常以謙虛待物可謂淑人君子邦家之彥者與爰以
貞觀十四年歲次庚子十一月壬寅朔十日戊子遷窆
于雍州三原縣洪壽鄉之原夫人李氏平昌縣主皇帝
堂姑王姬下降作嬪君子四德口口中饋六行懋于閨

儀婉孌○聲幽閑表德旣而于君長逝守志孀居同穴
之義莫從異路之悲奄至撫育遺稚皆遵禮度雖享○
存教斷織貽訓曾何足云嫡子正則等並學稟箕裘德
齊顏閔竭忠貞以事主極愛敬以安親列鼎切季路之
懷從車軫○參之歎乃詢諸古老考之前代紀素譽於
立石刻遺範於幽埏庶感風樹之悲以慰寒泉之思文
曰逝矣洪源遐哉峻趾崇山億丈長河千里陸離英彥
森梢杞梓纓冕遞承琳琅間起其一迺祖英果懍懍○霜
乃父誠積評評勤王雄圖獨運逸氣孤翔東征獻凱北
使歸壇其二篤生君子風神特達○侍丹墀警巡紫○腰

七世孫太師官旣合以時計之亦合則犀角乃頓之高祖行也惟謹瑾字別當從碑以正唐書之譌字秀整文尤典麗惜無撰書人姓名文中凡而字俱作隸體蓋碑在唐初猶有六朝餘韻也徑作徑字與處士張文起碑同張碑亦無書撰人名字亦多新別蓋貞觀十四年去龍朔元年僅三十餘年彼時俗尙如此耳他如稟作稟胸作匈鴟作鴟歌作哥驕作嬌柝作柝岱作岱總作惣樵作蕉均有俗有通惟四民設阜句設阜二字尤新異設音拏言絲亂不解以喻民俗之糺纏而富庶也

文中魏作魏楫作楫鹽作塩侯作候璿作璿臺作
臺隋作隋偃作偃裘作裘皆依原碑

唐左監門大將軍樊君碑

石高七尺濶三尺三十
一行行六十一字正書

大唐故左監門大將軍襄城郡開國公樊府君碑銘并序
若夫軒弧登御威有截而開基媯戚陳階格遠方而載
化是知器之攸假理無廢於三材國有所隆業有階於
七德皇家躍龍而啟千載翦鴻而清九野叱咤而會風
雲抑揚而徙舟壑其有應銜珠之象縱儼挺生延捧日
之徵程材命世繫桑以申其略坐樹以挹其庸惟襄城
公爲體之矣公諱興字積慶安陸人也將軍感燕取貴
易濱之義武陽讓楚終高戲下之功學稼問仁暎闕里

而騰譽推田削契掩湖陽而剋美自時厥後支分派流
昭被青編可得而略也高祖□魏武陵太守曾祖叡魏
員外散騎常侍巴州刺史新淦縣開國侯祖文寔隨南
陵太守並資忠爲德置言成範體三□而流潤苞六象
而揚輝雅達從□□□俗召父延於時諺任子悅於
毗心父方皇朝金紫光祿大夫慶善宮監藏器虛室戡
景太玄偶出震之休期縻賓王之華秩公攀鱗□□奉
勒□□露□露於紫宸燭靈輝於黃道體仁而賈其勇
由衷而講其信埒勁心於風草比貞節於霜筠言表身
文愼樞機於自遠行成士則摠枝葉於昌年超越女之

工五投豈傳其術高楚臣之藝七札本謝其能至於當
敵制權臨機授律明其可否之筭審其向背之宜聊取
鑠金之□□踐蜚鋒之地義旗肇建乃授朝請大夫隨
班例也尋破西河授通議大夫又平霍邑加金紫光祿
大夫特以戰功錚加勳級殊貸稠疊難用詳言旣而克
定京城加左光祿大夫除左監門郎將恩流□□屬
宸階嘉猷輔於紀明未佇司徒之表茂識逾於安世寧
資博陸之賢未幾以功次除左監門將軍周□□俟折
衝伊寄宮禁肅清簡在惟穆昆□□尚結妖氛聽鳴
輦而載懷命寅車而戡罰以破辭舉勲授上柱國西華

縣開國公賞物五百段楚班爲貴躡昭陽口大功漢誓
斯永聯穎陰之茂爵劉武口口口洛水肆虐懷生公迺
奉旌麾而電邁溺驂驪而風掃乃封襄城郡開國公賞
物千段於時三川振蕩羣醜虔劉口口歲駕預誅千紀
王世充竇建德因茲口蕩口勳餘十二轉迴授其子賜
物二千段金三十斤武德五年建德重茲兒聚帶州挺
亂於是長驅銳騎封豕滅妖加勳口轉賜物千段并奴
婢牛馬劉黑闥跋口口口陳兵曠歲公克宣智勇纖厥
奸渠以超輩之勳資物六百段六年破徐員瑒於徐兗
厥功斯懋賞物千段已丑三年手詔以公策名日久立

効居多因□□□軍將八年獯獫犯塞大駭涇陽權烽
夕舉胡塵曉望公推鋒轉鬪羣凶折首九年以公夙昭
勤効繪封四百戶授□國公貞觀六年破陵州羣獠賞
口六□□□授左驍衛將軍坐公事削十一年還除右
監門將軍望重禁闈誠深貞固驟招榮晉亟踐便繁十
五年扈從巡□□授左驍衛大將軍領千騎十八年授
雲麾將軍守左監門大將軍封襄城郡開國公食邑二
千戶十九年鑾輿東指龔行遼隧公於定州奉令乘駟
□□副梁國公宮城畱守任寄之重莫或與京宸駕凱
旋特蒙勞喻賜物三百段檢校右武侯大將軍廿二年

從幸玉華宮因而畱守有頃乃嬰風疾勅遣名醫就療
賜告還京砭藥亟加間月而愈廿三年除左監門大將
軍屬公車晏出綍翽晨移奉端闈而限赴望疑山而崩漂
從而負茲彌痼惻景推辰有司以寢瘵逾時因而奏解
爰降綸汗恩贍尤多給防閤祿賜國官府佐帳內一依
見職并遣醫資藥終始將療又降中使就第慰問賜絹
口匹終期介冑爲禮孤標細柳之名鍊石居心獨擅下
江之懿如何尺波行閱風駭龍驤之水一葉可悲霜凋
馬陵之樹以永徽元年四月廿三日終於雍州長安縣
懷遠里第春秋六十有三聖情念切惟舊傷悼者久之

贈左武衛大將軍洪州都督江饒吉袁鄂虔撫八州諸
軍事使持節洪州刺史賻絹布二百疋陪葬獻陵賜東
國秘器喪事所須隨由資辦給儀仗去還諡曰思公禮
也粵以其年歲次庚戌七月戊戌朔九日景午陪葬於
獻陵惟公德符先覺利見在□立功立事威稜懾遠信
義行於州里孝友著於家風喜愠不形寵辱惟一歌鍾
繼發無累虛白之心軒蓋交陰詎隔濠梁之想踐三宮
之奧先寘涇流之毒獎萬夫之勇方投越水之膠宜其
克壯風猷永綏多祐俄而丹鳥迅景下崦山而靡息白
馬奔濤委□□而□□長子護軍濮王府兵曹叅軍事

修義世子上騎都尉荆王府法曹叅軍事修武等下堂
斯愼恭孝之道夙彰趨庭有奉敦悅之風先備遽纏手
澤之慕□□□□之哀□□□駭遷壑相賀思媵鼎
之餘範懷景鐘之遺□萃琬勒其鴻規清芬垂而靡究
其銘曰

叔世道消夷羊在牧乘時啟聖長鯨且暴瑞興碭野祥
開□□式寄爪牙允資心腹其一山甫姬□□□□□

□巖巖□□瀾瀾祖考昭德騰華綈綺政體山蛇業甄
河豕其二介福潛衍克昌厥嗣贊軌驚冥承羈絕轡□□

□□□□□□聚米均聲沈沙比□□其三□□□□□□

□□□□如蘭堅心匪石家存衛劍門趨鄭驛藝優方

竊道希函席

其得

人斯盛多士維寧飭躬文□□□

肩□□挺銳括羽□貞功深□□□□□□□□

□□楹貽熙泗水迴瀾武山顏伋九京可作百身靡慙

麗龜輟枝飛龍罷引

其遠

日告辰如疑戒禮容車夙載

嚴闈早啟烟景空蒙風□□□□□□□□□□

而揮涕

其七

武德六年改武功宮爲慶善宮蓋以元宗誕於此

宮也玉華宮造於正觀二十一年七月在坊州宜

君縣之鳳凰谷碑云父方爲慶善宮監又云樊公

從幸玉華宮因爲畱守因病還京間月而愈蓋坊
州去京較遠也明年廿三年夏太宗崩太子治立
是爲高宗年號永徽其二年卽改玉華宮爲佛寺
矣樊公唐書無傳而唐會要陪葬獻陵名位中有
樊公之名獻陵陪葬太妃公主外自河間王至密
王共十八王而大臣陪葬者甚少一爲并州摠管
張縞其二卽爲樊公餘爲潭國公邛和巢國公錢
九隴刑部尙書劉德茂刑部尙書沈叔安六人而
已惟樊公史作榮國碑作開國公稍異不知孰是
樊公死於永徽元年卽以其年七月九日丙午葬

諱丙作景者避代祖元皇帝之名元皇帝爲高祖之姪太宗之從昆弟名曷碑蓋遠諱嫌名知唐之嚴於避諱如此唐制并荆燕等州爲大都督府官正三品洪越潤等爲中都督府官亦正三品惟通梁夔鄜涇潭等爲下都督官從三品死後贈洪州刺史蓋中都督正三品官也

化度寺海禪師墓碑

石方廣一尺正書

大唐化度寺故僧海禪師年六十有六俗姓劉綏州上縣人也永徽五年十一月八日卒於禪眾以顯慶二年四月八日於信行禪師所起方墳焉

顯慶三年歲次二月廿五日癸巳建

顯慶三年歲在戊午碑書歲次而不加支干自是創例字極工整可與平原抗衡惜姓名未之載耳文亦但書卒葬月日生年鄉里一洗唐碑繁縟之習良可寶也

駙馬都尉盧遜墓誌銘

石長方一尺
七寸楷書

大唐故駙馬都尉衛尉少卿息豆盧□墓誌銘 并序

君諱遜字貞順河南洛陽人也太祖武皇帝之外孫太宗文皇帝之甥也原夫星街北鎮氣雄高柳之鄉日域東臨威震扶□之表及祥分玉板運圯金行盛王業於雀臺肇霸圖於□塞辭燕入魏旣得□□□□□□□□成功於吳主故得門傳戈鼎業擅綢繆已宏散以孤征□□□□□□□□可得言焉曾祖通洪州總管沃野公諡曰安道濟風雲□□□□□□□□

□□□□□廡於朱駟落鳴鳥于玉輦百僚旣所共仰
金□□□□□□□□□□□□□□□禮部尙書左
衛大將軍光祿大夫行岐州判□□□□□□□□贈□
□□□□□□□□□□海岳擒靈辰象提氣風格沉肅凝
暎□□□□□□□□□□□□□□□□□□傳而
並馳榮數極於生前緝禮繁於身後□懷讓駙馬都□
尙□奉御□□□□□□□□□□府衛尉少卿地望高華音容
韶令家延□□室茂王姬同遊劍水之龍獨□□□之
鳳君卽衛尉第三子也親長沙長公主□□台於婺象
分玉種於藍田□□□□□□□□□□光以動色彩澄飛月凝

夜景以□□□□日稱奇髻初表疑□□□馬□□□
□□材肇自□羊方亢河東之美豈亡□□早歲獨茂
重立元鳳凰齡亟□□□□□□蓼痛□匪莪標氣
就淪惕□□□雖年代浸遠風枝之恨罔渝□綴外□
□□之情尤切至若教成斷緯業就離經筆海浮天鏡
璇波於扑岳談□麗日□□□□□□加以族茂燕垂
氣凌河右弓開明月碎密藻於楊塲騎轉浮雲散輕□
□□□故得薦紳屬望披薛馳心猶決羽之□丹鳥若
涓適之歸滄海豈謂寒風□□□□於初華繁霜夜
零剪庭芝於方秀嗚呼哀哉粵以大唐顯慶四年四月

十六日□於雍州萬年縣之常樂里第春秋一十有七
卽以其年太歲己未八月己巳□□□日壬申遷窆於
萬年縣少陵原禮也□□□梁景族□戚□□生平鐘
鼎之□□□分裾之會□天資澹雅性奧謙恭□□□
□之心自得風塵之表惜其英資□□□於明時盛
德芳華已淪於□窆長沙主□□□□□□□之
水碎□□□□□葬薄謝鴉鳶馬鬣開封竟□螻蟻故
□□□□□□□□□□□□□□□鳥見滕公
之白日泉飛□陽□陸□□□□□□□□□□
□□□□□□□□□□□□□□□□□□□□
而嘶馬秋風驚□□□□□□□□□□世田□方

易□舟□□□□□□□□□□□□□□□□永扇其詞
日地隔紫□是分柳塞山川盼響風雲□□□□□□
□□匪晞□□辭燕中山入代二公垂績所敷前載就
日標華浮霄□□□辟□□□□□□職移丹棘花飛
穠李門慶斯來篤生君子玉映方潤壁山齊美□海□
分□□鳳峙日烏空落蕃羊甞擬謙恭神授孝友天成
烟□自重戈鼎攸輕方遊星闕奄闕泉局將華落藥方
秀推榮百身何贖千祀徒名悵□秋蟲檐飛暗翼畫柳
朝引素騏夕急荒隴沉暉寒郊寡色□□遽返歸魂何
極空餘素範方標懿植

按唐書高祖十九女有二長沙公主一下嫁馮少
師一始封萬春下嫁豆盧寬子懷讓此碑文兩見
長沙公主并首行豆盧字尤完整知貞順之母卽
長沙公主始封萬春者無疑惜碑中但有曾祖通
名其祖寬其父懷讓名俱已剝落不可辨然唐書
但云下嫁寬子懷讓不詳主所出子何人得此石
知盧遜爲公主之子足以補史之缺

唐故處士張君墓誌銘

石高廣二尺
有奇正書

君諱興字文起南陽西鄂人也漢太史衡之胤胄昔靈
表西豐畱侯建幃幄之策星移東井常山與締構之功
或師範萬乘照彰圖藉光臨千里煥丙縑緇異動三台
識司空之忠烈吟謠兩穗表太守之仁明奕葉簪裾蟬
聯珪組規矩重疊代有人焉緬究遺編可略而言矣曾
祖瓘魏冀州信都縣令絃歌不奏美化洽於一同鳴琴
詎張仁風清於百里祖皮周太僕寺主簿才能幹濟智
畧強明尋□辟除轉授瀛州河間縣令父才隋揚州江

都縣薰輔弼風規俗流清化贊道名教邑致歌謠君胤
系高華等琨珥之良劔箕裘纂組若青邱之祥鸞義烈
因心未資於典籍忠良天縱不假於規模崇有道之林
宗慕無爲之李耳名利之所不拘榮辱之期混一弓旄
不應羔雁無移道契虛玄性符高尚縱寂寥而賞趨持
澹泊而怡神志道研精非邀鼎食窮微盡要詎徇輕肥
得性琴書吟嘯烟霞之表時談物義進退水鴈之間妙
疑榮期高符黃綺時遊三徑乍撫一絃以道義而爲尊
輕蟬冕而非貴探蹟幽隱迥邁莊惠之機致遠釣深遙
鉗黃老之趣想秦晉之有廷見潘陽之代親遂婚於辰

州辰溪縣令漢陽趙徽之女幽閒婉孌中饋事修懿淑
溫和母儀庭宇君纂業成勞遇楊雄之病疾淫書作療
遭皇甫之沉疴氣擁膏肓疾纏腠理屬華他而不瘳見
扁鵲而無瘳以貞觀廿二年七月廿七日卒於私第春
秋六十有二夫人趙氏卒於永徽四年春秋六十粦以
龍朔元年歲次辛酉十月癸亥朔廿三日乙酉合葬於
故鄴城西八里禮也面平原背漳浦左帶蕪城右連林
麓刊茲玄石紀以清徽勒彼鴻名光斯泉戶庶使青山
爲礪表盛德而彌芳碧海成田闢嘉聲而不泯嗚呼哀
哉乃爲銘曰

規矩重疊珪璋代暎三台表異兩岐興詠人倫揩摸搢
紳龜鏡百代逾芳千齡彌竟道合幽玄性符林壑迹齒
滄波名流臺閣貴不充諷賤不殞雙思巧雕龍光逾刻
鶴有謂昇堂相期入室帷薄猶空繁華未實儼忽不幸
咄嗟已失一棺既閑萬事長畢茗堯堯首巖巖山足露
消草翠風飛樹綠玄門一掩寒燈無旭私壤式題貞芳
載燭

此碑無書撰人姓名字頗渾樸不見采於王氏萃
編碑石完好想近日出土蘭泉先生未之見也文
中聯作聰字書無聰字卒作粹通卒說文曰大夫

死曰殍旌作旂徑作徑皆古通迅字不見字書莊
作症俗字鉗黃吉之趣鉗取也楷模作揩摸揩平
聲摩拭也摸音莫摸索也或通摹不與摸通揩摸
不與楷模通一時筆誤耳昆吾俗作琨瑀河圖云
流川多積石名琨瑀石鍊之成鍔以作劍光明如
水精故劍之美者曰琨瑀吳均詩云我有一寶劍
取自昆吾溪照人如照水切玉如切泥昆吾曰溪
蓋指石在水中也又可通作鋤鋤見列子竟卽競
字壑作瑩俗諷字儼字不見字書諷想卽屈字儼
想卽倏字閑俗閉字 虔字隋字熬字万字皆依

原碑

雷太岑造像碑

石高一尺二寸濶三尺
正書廿三行行十字

若夫二儀有象顯覆載以含生四時無形潛寒暑以化
物是以庸愚者皆識其端○陰洞陽賢智者罕窮其數
況乎佛道崇虛乘幽空寂宏濟○品典御十方○威靈
而莫○抑神力而無下大之○於宇宙細之○于豪釐
無滅無生歷千劫而不○若隱若顯○百福○妙通
凝○莫知○蠢蠢○區區○早
○○○○○○○○十二人○○○○○○早
悟三空之心○菩提建立禪象一區一爲皇帝陛下

法界一切眾生及所生父母因緣眷屬早登菩提同臻彼岸

龍朔元年歲次辛酉七月甲午朔廿三日丙辰成佛弟子雷太岑

民間造像以祈福壽或言自爲己身或保及妻子
上推父母止矣此獨追尊皇帝下及眾生是爲創
例字亦方正得北派正傳此本得自都城厥肆不
知石存何處遍檢金石遺文概不著錄殊令人望
古翹思不寘也

張君懷玉銘

石長方尺
二寸楷書

大唐故張君之銘

君諱對字懷玉南陽白水人也祖貴朝散大夫父素身
有勲官潛居白屋惟君積善餘慶始驗無徵構疾一宵
遂殞和弟粵以光唐乾封三年歲次戊辰正月乙酉朔
十七日辛丑春秋一十有七卽以其月二十五日殯于
龍口西平原禮也恐陵谷遷變滄海成田勒石泉扃傳
芳永久

碑字工整有李北海風度惟云積善餘慶似非頌

美十七歲童子語氣想搆疾一宵遭恨千古愁憤
之過不自檢攝耳

唐故韓君墓碑

石長方尺二寸十二
行行十三字正書

大庠故韓君之墓誌

君諱寶才長安人也君德行著于鄉閭義物芳於隣里
不謂天降痼疾漸加困劣名醫頻療曾不見瘳忽以咸
亨四年歲次己酉十月朔廿九日卒于京城懷德之第
春秋七十有三遂以其年十一月九日殯于京城西布
政之原小嚴村之左恐年代遷移墳將凋落勒茲玉琬
以記其處乃爲銘曰

然君孝口莫不恭順生前著芳沒後畱潤

此碑字極秀潤有李北海夫子廟碑神韻而整飭
過之惜無書人姓名其唐作唐任意將口移上不
知所本咸亨四年歲在癸酉此云巳酉一時筆誤
耳

阿彌陀像文

石長二尺四寸
闊一尺二寸正書

阿彌陀像文

竊以理寘真際證一法以標同道契應機隨十方而顯
號故以光開別相起化逾宏業現他心崇因更遠是知
方稱妙樂開妙覺之重闡玉樹金臺啟菩提之秘苑觀
日觀華之□紫深習于薰脩仰十□以虔誠妙旨資其
密感弟子宣義郎周遠志等並翹想馳于法浦乃結願
于西方僉憑六八之言遂要盟于彼會然卽幽途皎鏡
承慧日於堯天覺路重開蕩六塵於舜海旣而沐茲鴻

造想荷恆深罄臣禮而寫真容申孝仁而圖淨域奉爲
天皇天君太子諸王遠劫師僧七代父母敬造阿彌陀
石象一龕今得成就素臺融質囑三界而凝明聖眾乘
心覃太虛而應物祥花捧座延勝福于花臺寶樹流光
證慈光於道樹蓮開滄沼瑩朝日以增暉聚月分容闢
昏衢而永旦用斯功德保祚皇基兼被幽明同歸福海
堅通有頂摠契无生傍亘無邊俱昇淨境

大唐上元二年十二月八日功記口

東申 吳進四巳日

碑無撰書人名想卽周遠志所自爲也文尙雕琢

對未精工字頗雅飭惜多新別文中如脩作循毫
作毫融作融延作延契作契碧作碧皆任意增損
未得六法之正至所云延勝福于花臺可知花臺
二字釋氏常用號國公楊花銘自當以楊氏屬上
作姓解金石錄以爲臺名楊花風韻可喜足發一
笑蓋楊卽楊思勗特書姓不書名耳得此碑可以
證號國公楊碑潛研堂解注楊字之確

亡宮六品墓誌

石長潤
俟考

大唐故亡宮六品墓誌

承芳蘭蕙稟性松筠族茂五陵望雄六郡嬪風早著柔
範夙彰粵以良家言充永巷盤龍明鏡契玄鑒於靈臺
迴文綺機荷巧思於神府春秋六十以儀鳳四年十月
二日葬於城西禮也其詞曰

□暉過隙閱水驚川□辭明宇永閔窮泉隴寒霄月松
深曙烟唯餘令範千載攸傳

案唐制皇后之下有貴妃淑妃德妃各一人爲夫

人正一品昭儀昭容昭媛修儀修容修媛充儀充容充媛各一人爲九嬪正二品婕妤九人正三品美人九人正四品才人九人正五品寶林二十七人正六品御女二十七人正七品采女二十七人正八品以備周禮六宮之數其外又有尙宮尙儀尙服尙食尙寢尙功諸名目龍朔二年改易官名置贊德二人正一品以代夫人宣儀四人正二品以代九嬪丞門五人正四品以代美人承旨五人正五品以代才人衛仙六人正六品以代寶林供奉八人正七品以代御女持節二十人正八品以

代采女又置侍中三十人正九品咸亨二年仍復
舊號此碑云亡宮六品下云儀鳳四年則去咸亨
已七八年久經改從舊號所云六品者寶林二十
七人中之_一也惟儀鳳止有三年其四年已卯六
月已改元調露此石建於四年十月何以尙沿儀
鳳之稱殊不可解搨本藏於紹興後馬周啟人家
庚戌八月抄本見贈因編錄之其石想不甚大尺
寸未敢懸揣也碑中稟作稟靈作靈皆俗字

朝請大夫陳府君墓銘

石長方一尺
六寸正書

唐故朝請大夫陳府君墓誌銘

君諱護潁川人也昔釐降二女唐堯安洪水之災運□
六奇漢祖免白登之敗其後太邛之長道貫聚星河朔
之才文光倚馬地靈相繼時英不絕曾祖並絕幹干尋
斷山萬仞一簣發簾金之彩五車覽羣玉之書君姿靈
秀氣誕粹冲和澄雅操以霜明照清規而月舉踐義爲
勇履孝成忠漸礼義之膏腴嗣箕裘之聲訓藏器而逢
亂代進德以及明時爰屬義師暫披誠款推鋒後殿擢

甲先登雕弓挂滿月之輝雄劍耿長天之色蒙授朝請
大夫賞有功也旣而輕忽簪組踞傲泉石魚山騁望懷
子建終焉之心鵬海驚濤養孟軻皓然之氣惜乎浮生
易天七百之壽未階飄忽難畱千月之期行盡以上元
元年終于私第春秋一百有一夫人蔡氏卽以垂拱四
年正月廿三日合葬于□時鄉札也子文德仰高天而
垂弔踰厚地以經哀恐舟壑潛移莫辨藤公之室海田
斯變不曉原氏之仟式誌陰溝乃爲銘曰

至矣大君超然不羣事君以敬在家必聞信著朋執義
□仁恩早霑舜雨夙奉堯雲提戈仗劍掃祲除氛□□

○畧功橫大勳循路頓阻昭代俄昏落徂光之□□□
長夜之歸魂起寒烟于櫬塋下白露于松門□□□□
百代後寧知埋玉此耶墳

碑無撰書人姓名文溯曾祖不叙祖父自是墓誌
創格此乃捉刀人疏畧不可以爲例也文對偶尙
工字亦瘦勁幹字不見字書想是幹俗體礼字乱
字俱從原碑